

東

華

錄

東華錄

康熙三十三

臣王先謙敬編

周潤蕃恭校

康熙三十三年甲子春正月辛巳 上幸南苑行圍○癸未 上

還宮○乙酉黑龍江將軍薩布素等奏牛滿羅刹抵恒滾同來自  
北海之羅刹與飛牙喀戰退居河洲若不速計勦撫則赫哲飛牙  
喀奇勒爾人民必被殘害且恐羅刹復增發前來宜乘四月冰解  
時卽遣夸蘭大二員率官兵三百人並發紅衣礮四具令附近恒  
滾口飛牙喀噶克當阿等嚮導抵羅刹所踞地先行招撫不卽歸  
降則進兵勦滅如羅刹聞風先遁則所發之兵卽乘機安輯赫哲  
等處人民未經來附者亦招撫之報聞○丙戌諭刑部禪塔海自  
爲刑部侍郎以來並無效力處每緣事降級戴罪留任仍不悛改

盡職凡事遣大臣往審者求其得實沈上達事發覺後朕知巡撫  
金僞行事汚濫故遣禪塔海前往嚴審乃不將金僞污濫及致死  
沈上達滅口之處審出妄奏縊死是實朕面質其妄禪塔海堅稱  
縊死是實如有別情願甘受死卽此觀之雖下等司屬亦不如矣  
此人不行懲治則污濫者不知畏懼著將禪塔海拘禁與此事一  
併嚴議具奏○封安親王岳樂子袁端爲多羅勤郡王多羅貝勒  
魯克度子魯賓爲固山貝子○以杜臻爲工部尙書由吏部左侍郎遷余  
國柱爲左都御史由江甯巡撫遷○丁亥福建提督靖海將軍侯施琅奏  
請設臺灣鎮守官弁 上問大學士等曰爾等之意若何李霨等  
奏曰據提督施琅奏云臺灣有地數千里人民十萬棄之必爲外  
國所踞奸宄之徒竄匿其間亦未可料臣以爲守之便 上曰臺  
灣棄取所關甚大鎮守之官三年一易亦非至當之策若從其民

人又恐失所棄而不守尤爲不可爾等可會同議政王大臣九卿  
詹事科道再行確議具奏尋議政王大臣議覆行令福建督撫提  
鎮詳議從之○予故原任禮部左侍郎楊正中祭葬○飭內外問  
刑官毋非法拷訊○壬辰命整肅朝會筵宴禮儀○以張道祥爲  
湖北按察使由山西雁平道遷○諭大學士等各部院司官內才具庸劣  
者曾經有不時糾參之旨然參處者甚少雖有一二糾參皆係末  
員其實係庸劣無能者多徇情面不行參處其狂妄好勝專恣行  
事者較庸劣無能之人爲害更甚各部院中有朕所明知而徇情  
不參者亦有之其飭諭部院衙門各該所屬司官內有庸劣無能  
妄行好勝專恣行事之員即行指名題參○乙未調陳廷敬爲吏  
部左侍郎管右侍郎事由禮部調○丙寅諭大學士等副都御史塞克  
德自簡任以來並未見陳奏一事才具庸劣且非醇厚之人可令

解任朕觀部院官員懶惰者甚多一遇苦差或有稱病規避者嗣後部院官員或病或有事故俱著註冊以憑分別勤惰今觀尙書薩穆哈颶勉供職部務漸覺整理且各處工程錢糧俱得節省著察所降之級復還又諭督撫乃封疆大臣通省民命所關世祖章皇帝時所用者尙屬循良逮至輔臣時自用張長庚白如梅張自德賈漢復屈盡美韓世琦等匪人以來擾害地方以致百姓困苦已極今之督撫較前雖覺稍愈而相沿成習尙未盡改見在浙江湖廣總督江甯巡撫員缺最爲緊要必擇賢能補授方於地方有濟如不得其人則百姓受害不可勝言矣此三缺爾等加意詳審務得相宜之人補授爲當尋大學士等遵旨公同舉出浙江巡撫王國安湖南巡撫王新命安徽巡撫徐國相等得旨王國安升補浙江總督徐國相升補湖廣總督王新命調補江甯巡撫

二月己亥諭翰林院掌院學士牛鈕孫在豐翰林院乃儲養人才之地敎習庶常當以品行文章爲事一切交際禮文皆宜杜絕近聞有餽送重禮者庶常常俱甚寒苦自翰墨外不宜別有所取前拉薩禮在時待伊等甚善所以至今有感念者至庫勒納以來交際之風寢盛爾等宜加洗剔毋負朕簡任之意○辛丑轉佛倫爲刑部左侍郎以鄂爾多爲刑部右侍郎原任○子故四川巡撫杭愛祭葬謚勤襄○乙巳 上御經筵○諭兵部步兵看守街道巡更司警原以防閑匪類近見凡係貴顯之人多帶僕從夜行並不緝拏惟微賤單身行走卽行緝拏勒索財物甚而向販索取所賣薪炭等物以致民人咨怨似此必特加究治庶幾此風可息可將步軍統領嚴行申飭爾等亦宜不時加意巡視○轉張玉書爲禮部左侍郎以胡簡敬爲禮部右侍郎由內閣學士遷○丁未以席爾達爲

左副都御史

由太常寺卿遷

○己酉以趙士麟爲浙江巡撫

由左副都御史遷

薛

柱斗爲安徽巡撫

由太常寺卿遷

○庚戌內閣及各部院等衙門遵旨糾

參才力不及暨狂妄行事內閣侍讀王三省等三十八員分別降革有差

○壬子以湯斌爲內閣學士

由左庶子遷

○癸丑上巡幸畿

甸皇太子允礎從○甲寅諭扈從大學士等朕凡理政事務得

其當故凡部院所上奏章雖小事未有不盡心詳究者近見戶刑

二部啟奏之事最爲繁冗皆錢糧刑名所關若一時不加詳閱恐

有貽誤前此奏章俱三日一送此後令兩日一送○己未以慕天

頤爲湖廣巡撫

原任江甯巡撫

○大學士黃機以老病乞休允之○乙丑

給事中王承祖奏請巡狩燔柴泰山卽過孔林觀禮器九卿等議

應准行得旨著候旨行其合行典禮察明具奏○丙寅上還駐

南苑

三月丁卯朔裁河南衛輝府管河同知將河務歸衛輝府通判兼  
理添南陽府同知分轄鄧州內鄉新野淅川鎮平五州縣駐淅川  
專理捕務○戊辰上還宮○諭吏部州縣官遇易結之事曠日  
遲延竟不完結者甚多其違限三四月者卽係不能稱職應行罷  
斥以疏進士出身之仕路令九卿詹事科道會同確議定例具奏  
尋議州縣官將易結之事遲延不結除違限一月二月者照舊例  
處分外違限三月者降三級調用違限四月者革職再查吏部定  
例知縣出有十缺除推升二缺外其大選八缺進士舉人貢監選  
授三缺捐納人員選授五缺嗣後大選八缺議將進士選授二缺  
舉人貢監以知縣用者選授三缺捐納人員選授三缺庶進士仕  
路疏通從之○辛未浙江巡撫金鉉奏海上烏洋舟山僞將軍黃  
錫鵬周雲隆僞都督阮繼先率僞官百員兵四千一百餘名投誠

○壬申以張可前爲左副都御史由太常寺卿遷○以福建投誠僞將軍

由太常寺卿遷

劉國軒爲直隸天津總兵官○癸酉諭大學士等戶部管理各省

錢糧一時難以清楚地方督撫將在庫銀兩那移私用雖云補墊

及題奏時多蒙混銷算部內無從稽察百姓深受其害卽今原任

廣西巡撫郝浴侵欺銀至十九萬兩由此觀之天下類此者不少

朕日夜思維欲清查各省錢糧訪之外任官員及督撫等皆云清

出存留錢糧則別項錢糧自然清楚朕思此事一行雖在外督撫

司道不無被罪實於國家有益果錢糧充足更可爲加恩百姓之

用今九卿曾爲外官者多知之必詳爾等會同詳議以聞尋大學

士會同九卿等詳議具覆一凡奏銷錢糧應將存留起運逐項分

晰並報部年月明白造冊毋致蒙混駁查如有駁回者將該督撫

照蒙混例處分戶部司屬不行詳查亦交吏部議處一支給各省

駐防官兵綠旗官兵米豆草束除折價地方不議外如支本色地  
方儘本省所屬支給如有不敷照時價給發官兵自行採買如有  
將價值浮折具題者將該管官並督撫照例處分一各省採買米  
石各項從前有價值浮多者有支領並無實據者應行令該督撫  
清查定限一年追完如不完將經催官並督催之督撫俱照承催  
不力例處分一兵馬錢糧數目有舛錯者應令各省將軍督撫提  
鎮各將弁印領結狀按季送部以便清查如有不符照蒙混例處  
分一直隸各省奏銷錢糧凡有駁查者俱令具題完結不得以咨  
文塞責得旨本內第一款奏銷駁回事情著照見行例行餘如議

○吏部兵部刑部會議廣東查看尙之信家產侍郎宜昌阿同巡  
撫金僞侵蝕兵餉及入官財物又乾沒尙之信商人沈上達財賄  
恐後告發將沈上達謀害滅口應立斬道員王永祚等分取財物

又同金儻謀死沈上達應立斬郎中宋俄託員外郎卓爾圖等應擬斬秋後處決伊等共侵銀八十九萬餘兩並財帛等物應追入官差審金儻刑部侍郎禪塔海將沈上達事不行審出及 皇上問時又稱沈上達縊死是實應擬絞秋後處決都統賴塔私取入官之人亦應從重治罪得旨金儻居官本無善狀所行貪穢罪應如是宜昌阿事有不同一例問罪稍過此係大案仍令九卿詹事科道三法司衙門議政王大臣等會議使眾知之○ 上校閱入旗文武大臣官員騎射自是日始以次幸入旗演武場○丙子正陽門外民居火 上御正陽門樓遣內大臣侍衛撲滅之○癸未河南饑命有司開常平倉賑濟○丁亥諭大學士等朕前奉 太皇太后詣五臺山觀覽山川形勢一一親厯其地每臺各制碑文今錄出翻譯滿書與漢書並勒於石朕所撰碑文一時結構爾等

可與漢大學士等詳加斟酌近見漢人中有自負才高每一文出不容人點竄此習俗之可鄙文之所以不工也大學士明珠奏曰聖上聖學天縱睿藻夐絕出入經史臣等豈能仰窺萬一而謙抑之懷尤爲古帝王所不及 上曰文貴於簡可施諸日用如章奏之類亦須詳明簡要明朝典故朕所悉知其奏疏多用排偶蕪詞甚或一二千言每積滿几案人主詎能盡覽勢必委之中官中官復委於門客此輩何知文義譌舛必多奸弊叢生事權旁落此皆文字尤穢以至此極也又諭爾等所修之書往日告成呈覽朕萬幾之餘講求經史無多暇晷而書成盈帙堆積几案一時亟於披閱未得從容研索體驗於身心政事今聞明史將次告成若將已成者以次呈覽亦可徐徐繙閱考鏡得失不致遺漏○江甯巡撫余國柱奏 上用段疋皆係寬機織造請增設機房四十二間

得旨寬大段疋亦間時所用非常用物也何爲更勞民糜費余國柱所奏不准行○壬辰命察宗室及八旗大臣官員緣事閒廢者量予錄用○癸巳議賑直隸河南饑廷臣請開捐例不許

夏四月丁酉遣官察賑河南○天津總兵官劉國軒陞辭 上諭

臺灣地方阻聲敎者六十餘年爾素懷忠誠值施琅督兵進剿首先歸命是以特授爲總兵官以示優眷但天津地方近在畿輔與別省不同爾宜加意撫輯使兵民相安盜賊屏迹且爾從閩海來並無親知故舊當盡職以副朕懷又諭朕嘉爾海外倡率歸誠且孤身遠來今當赴任殊爲可念故於常例之外賜爾白金二百兩表襪二十疋內廄鞍馬一匹以示異數○庚子 上御乾清宮親講亢龍有悔一節講畢顧講官等曰亢龍有悔一節何以注在不應講之例天道人事亢則有悔易中所言無非此理正宜以此爲

戒不必避忌以後繫辭講章不分應講與不應講俱以次逐節進  
講諭大學士等凡爲臣子必實心任事興利除弊不苟且塞責俾  
衙門事一切整頓無有廢弛斯不負職業若循分碌碌因人成事  
雖小有勤勞殊無足取○禁各省駐防滿洲兵於戍所置田產立  
墳墓○予故原任江西巡撫佟康年祭葬○辛丑 上幸玉泉山  
○甲辰刑部尚書喀爾圖以年老乞休允之○丁未 上還宮○  
戊申大學士等奏臣等遵旨傳諭六部堂官應補各處關差將才  
守俱優小心謹慎之人保舉開送今六部滿漢堂官俱云若保舉  
辦事有才及謹慎者尚有其人至於操守知之實難 上曰清廉  
節操如何可廢凡犯貪惡之人發覺後自有應坐之罪如郝浴在  
廣西居官甚好然猶侵蝕錢糧數萬魏象樞曾薦過郝浴此等情  
事魏象樞安能豫知卽如部院堂官朕皆信其清操而委任之堂

官亦信司官而委任之各衙門官員或謹慎有守或生事奔競豈有不知者但將有守之人舉出則被舉者自能效力爾等卽行傳諭○己酉差往福建料理錢糧侍郎蘇拜會同福建督撫提督等奏臺灣地方千餘里應設一府三縣設巡道一分轄應設總兵官一副將二兵八千分爲水陸八營澎湖應設副將一兵二千分爲二營每營各設遊守千把等官從之○辛亥吏部奏據陝西督撫咨稱原任刑部主事桑阿布隨經畧莫洛出征不知下落應暫註冊俟其事白再議得旨桑阿布於亂軍中殉難是實若註冊以俟事情明白則何時得明卽著照例議卹尋部議桑阿布應給與施沙喇哈番世職從之○九卿等議准工部侍郎金世鑑奏 皇上德威遐布海外悉甯浙江沿海地方請照山東諸處見行例聽百姓以裝載五百石以下船隻往海上貿易捕魚豫行稟明該地方

官登記姓名取具保結給發印票船頭烙號其出入令防守海口  
官員驗明印票點明人數至收稅之處交與該道計貨之貴賤定  
稅之重輕按季造冊報部至海口官兵請於溫台二府戰船內各  
撥二十隻平定臺灣所獲哨船撥八十隻令其分泊防守巡邏從  
之○壬子刑部左侍郎宋文運以病乞休命加太子少保致仕○  
癸丑以諾敏爲刑部尙書由護軍統領遷○丙辰以王國泰爲安徽按察  
使任原○工部奏請敕諭直隸河南巡撫嚴飭所屬官員閉塞衛河  
水口勿使旁洩以濟漕運俟漕船過完照常聽其分流 上曰漕  
運所關雖係甚重但直隸河南之民多資衛河水利若水口盡行  
閉塞不使稍洩田禾一遇旱乾瀕河之民必致艱苦又部議俟漕  
船過後方聽照常通流耕種自有定時如漕船過完方許溉田則  
田禾究竟無濟朕聽理諸事必於民生關係之處詳悉籌度而後

施行該部所議但期不誤漕運初未嘗計及民生關繫處也○庚申諭大學士等朕觀部院衙門啟奏之事雖俱有關繫然有一事而經兩部啟奏方結者有不甚緊要亦經兩部啟奏方結者卽如兵部議敘軍功之事必請下吏部及至吏部乃並無用察覈之處復行啟奏如吏兵二部議敘功牌可以會同一次題覆事旣不繁且經兩部詳確會議不至舛錯再議至分編佐領事戶部奏過而兵部復行題奏兩部啟奏重複委屬繁冗以後如此等事俱著兩部會同啟奏爾等可傳諭知之○壬戌轉高爾位爲刑部左侍郎以馬世濟爲刑部右侍郎由左副都御史遷○癸亥靖逆將軍侯甘肅提督張勇病篤上命其子大理寺卿張雲翼馳驛同御醫前往調治○乙丑諭講官牛鈕等講章辭取達意以確切明晰爲尙如本文敷衍太多則篇末未免重複大約詮次本文原在了徹聖賢意

旨而篇末該括數語又責闡明理道務去陳言朕閱張居正尙書四書直解篇末俱精實之義無泛設之詞今後所撰詩經講章亦須體要備舉期於盡善○調王守才爲通政使以吳興祖爲內閣

學士

由內閣侍讀學士遷

五月丙寅朝諭大學士等前輔臣時有白衣佐領下一人外作善狀內懷兇惡屢經懲戒全不知改卒爲強盜於通州地方被擒有白衣大赴通領糧遇見之云爾不肯悛改今事發矣因歷數其惡以鞭鞭之後鞫審時遂銜恨扳陷白衣大同爲強盜其同夥盜皆云勿妄陷無罪之人其人不聽此白衣大竟坐強盜正法白衣佐領下人無不知此事者由此推之天下如此等事不少朕常以此爲念凡裁決政事遇有重罪雖應死必於死中求其生路反復推詳下部再議必無疑竇然後完結此甯失出無失入之意也○調

王國安爲福建總督裁浙江總督○己巳纂修大清會典○丙子諭九卿詹事科道等御史衛執蒲奏請御門聽政或以五日或以二三日爲期其意蓋欲君臣之間政事餘暇稍得休息也朕自躬親庶政宵旰弗遑念致治之道務在精勤勵始圖終勿宜有間二十餘年以來於凡用人行政事無鉅細罔不殫心籌畫早夜孜孜有如一日郊廟禋享必躬執祀事間有不親詣之時皆甚非得已至於內殿齋居幾微悉謹左右督御咸所稔知在朕未明求衣辨色視朝日與大小臣工率作省成用熙庶績近念爾諸臣奏事勞苦少展御門晷刻俾得從容入奏非圖便安邇年海宇敉甯政事漸簡頃復諭部院事務應得歸併者酌量合奏期於簡要清省從此民生日康刑清政肅部院章奏當不期省而自省必豫定三日五日以爲奏事常期非朕始終勵精之意也○丁丑以拉篤

祐爲左副都御史

由通政使遷

○奮威將軍平涼提督王進寶以病乞

休

上命其子太原總兵官王用子馳驛同御醫前往診視○予

故江南江西總督于成龍祭葬謚清端

○己卯以黃性震爲廣西按察使

由直隸道遷

○予故左副都御史雅思哈祭葬○庚辰添設

山東濟南城守參將一裁臨清營都司安東營守備二

○辛巳諭

大學士等凡居官以清廉爲要今九卿若有所知者勿論內外大

小官員俱令舉出○以張鵬爲左副都御史

由右通政遷

○壬午戶部

奏丈量過旗下大臣官員及投充民人溢額地畝暫留原主名下

需用時再行撥給

○上諭大學士等田地爲民恒產已經給與者

不便復取其旗下大臣官員既有溢額之地理宜註冊俟需用時

再行撥給民地不可輕動○九卿詹事科道遵旨舉出清廉各官

直隸巡撫格爾古德吏部郎中蘇赫范承勳江南學道趙崙揚州

府知府崔華兗州府知府張鵬翮靈壽縣知縣陸龍其等 上曰  
格爾古德居官本好近聞患病亦甚羸弱已差御醫前往調理陸  
龍其向亦聞其居官甚好今諸臣俱各稱善想當不謬但從此以  
後操守不改永著清名方爲真實好官這舉出各官已悉○癸未  
議政王大臣等議惠郡王博翁果諾庸懦懶惰祭 地壇時未曾  
患病不行齋戒應削去王爵 上命勒德洪明珠奏聞 太皇太  
后尋勒德洪明珠回奏奉 太皇太后懿旨博翁果諾身膺王爵  
不盡力事上彼荷誰之恩而致此其爵自應削去 上曰博翁果  
諾著削去王爵○議政王大臣等遵旨議覆廣東查看尙之信家  
產侍郎宜昌阿及巡撫金雋等分別定罪 上曰宜昌阿金雋宋  
俄託卓爾圖尙之璋甯天祚王瑜等俱依擬應斬王永祚依擬應  
絞俱監候秋後處決凡差往各處大臣司官所帶筆帖式必揀擇

賢能帶往苟不預事何用選爲既經預事其大臣司官妄行豈可不行阻抑有利同取有害則於中脫免非法之平且各部院私作弊端皆起自筆帖式本內伊色碩多禮情罪可惡著改爲應斬監候秋後處決禪塔海著革職都統賴塔征勦雲南著有勞績從寬留都統任削去加級罰俸一年案內應追銀兩不必令內務府追取著交戶部撥充兵餉餘如議○甲申 上出古北口避暑○諭戶部民間田地久已有旨永停圈占其部存地畝分撥時或不肖人員借端擾害百姓圈占民人良田以不堪地畝抵換或地方豪強隱占存部良田妄指民人地畝撥給殊爲可惡直隸巡撫可嚴察此等情弊指名糾參從重治罪○以王新命爲江南江西總督皆云見在雅克薩尼布湖二城各止五六百人其得以盤踞多年

由江甯  
巡撫遷

○阿達哈哈番馬喇等奏臣至索倫屢行密詢羅刹情形

者惟賴額爾古納口至雅克薩至布爾馬大河口十餘處築室散居耕種自給因以捕貂尼布湖田畝不登但取資納米雅爾諸姓貢賦喀爾喀巴爾虎人時販牲畜等物至尼布湖尼布潮人亦捕貂與之交易得以生存臣請敕喀爾喀車臣汗收其所部附近尼布湖者兼禁止交易再請敕黑龍江軍水陸並進作攻取雅克薩狀因取其田禾則羅刹不久自困量遣輕騎勦滅似易 上諭兵部據馬喇等奏取羅刹田禾當不久自困又侍衛關保來奏將軍薩布素等亦以取羅刹田禾爲然則羅刹盤踞雅克薩尼布湖惟賴耕種若田禾爲我所取誠難久存其令薩布素等酌議或由陸路進或水陸並進盡刈其田禾不令收穫由陸路進以所刈之禾投江下流水陸並進以所刈之禾船載以歸於未進兵時先遣人傳示羅刹云爾等據我雅克薩尼布湖多歷年所

屢令撤還遷延不去且收我逃人侵我邊民今大兵水陸進剿爾其遠退以保餘生並將馬喇等奏移文車臣汗知之

六月壬寅

上駐蹕蘇貝昂阿柏爾車爾諭從臣約束僉從毋踐

禾苗○丁未禮部議覆冊封琉球國王使臣翰林院檢討汪楫內閣中書林麟奏中山王尙貞親詣館舍懇臣等轉奏願令陪臣子弟四人赴京受業考之史冊唐貞觀中新羅百濟俱遣子入學琉球自明初內附洪武永樂宣德成化間琉球官生俱入監讀書今國王尙貞遠被皇仁傾心嚮學應准所請聽其遣陪臣子弟入監讀書從之○庚戌扈從諸臣奏聖駕今往牧馬地方可乘便經過烏蘭哈達等處彼處水草甚佳獸類繁多誠爲勝地但無柴薪今御前所用柴薪已經豫備其餘官軍宜各帶柴薪前往上曰此非爲朕一人要當爲眾人計朕所需用豈至有誤惟恐

官軍不能攜帶柴薪以致窘急獸類雖多眾人不免愁苦朕有何樂卽今天下偶有一方以水旱見告朕必遣官支發倉廩卽行賑濟雖邊疆海島之遙朕尙惻然加念豈於近侍官軍令其忍飢行走乎爾等另擇有柴薪地方來奏在爾等有管軍之責亦應體恤羣下也○甲寅暹羅國王森列拍臘照古龍拍臘馬嘯陸坤司由提呀菩挨遣陪臣坤字述烈瓦提等奉表進貢疏言貢船到虎跳門地方官阻滯日久迨進至河下將貨物入店封鎖候部文到時方准貿易每致毀壞乞敕諭廣省地方官嗣後貢船到虎跳門於具報之後卽放入河下俾貨物早得登岸貿易又本國採辦器用乞諭地方官給照置辦勿致攔阻又貢使進京先遣貢船回國次年再差船來廣省迎接 聖敕歸國得旨覽王奏航海遠來進貢方物具見悃誠可嘉餘著議奏尋部議應如該國王所請從之○

諭副都統巴圖一等侍衛阿南達等邊外八旗蒙古與在內八旗  
一體朕未嘗分別內外今朕巡行之次見其衣食常乏朕心深爲  
惻然著通行曉諭所過地方蒙古人等有齶寡孤獨老病不得其  
所者令其來見加恩賞賚且因其來見朕亦可以悉其生計嗣後  
每日諸蒙古人等各扶老攜幼至行宮前叩首 上命其中曉事  
者進見詳問年齒生理又降溫旨均賜壺飧酌量給與銀兩布疋  
○乙卯 上御額爾通阿拉所設黃幄閱視馬駝牛羊牧羣諭溫  
郡王延壽曰朕雖未見先代幼時好與諸故舊老臣談論得悉  
祖宗興隆時所行事宜昔 太宗皇帝凡閱視牧羣令諸王親於  
羣內選取良馬今朕巡幸諸王並未扈從止汝一人在側可往視  
朕親乘內廄之馬選取二匹溫郡王起立卽親揀馬二匹其扈從  
內大臣都統前鋒統領護軍統領等賜內廄馬各一匹侍衛前鋒

參領護軍參領以下及八旗前鋒護軍察哈爾蒙古官軍並執事人等各賜馬一匹內正黃旗前鋒參領西圖鑲白旗前鋒參領塔爾代因效力行間人材壯健於常賜外各賜內廄馬一匹以獎之○刑部尚書魏象樞罷○丁巳諭大學士等凡所貴道學者必在身體力行見諸實事非徒託之空言今漢官內有道學之名者甚多考其究竟言行皆背如崔蔚林之好事居鄉不善此可云道學乎精通道學自古爲難朕聞學士湯斌曾與中州孫鍾元相與講明道學頗有實行前典試浙江操守甚善可補授江甯巡撫○庚申以下永譽爲江蘇按察使由陝西驛  
右道還

東華錄

康熙三十四

臣王先謙敬編

周淪蕃恭校

秋七月丙寅以教化新爲廣西布政使

由浙江按察使遷

○己巳予故福

建總督施維翰祭葬謚清惠○乙亥奉差福建廣東展界內閣學士席柱復命奏曰臣往海展界福建廣東兩省沿海居民羣集跪迎皆云我等離舊土二十餘年已無歸鄉之望幸皇上威德削

平寇盜海不揚波今眾民得還故土保有家室各安生業仰戴

皇仁於世世矣

上曰百姓樂於沿海居住原因海上可以貿易

捕魚爾等明知其故前此何以不准議行席柱奏曰海上貿易自

明季以來原未曾開故不准行上曰先因海寇故海禁不開爲

是今海氛廓清更何所待席柱奏曰據彼處總督巡撫云臺灣金

門廈門等處雖設官兵防守但係新得之地應俟一二年後相其機宜然後再開 上曰邊疆大臣當以國計民生爲念向雖嚴禁其私自貿易者何嘗斷絕凡議海上貿易不行者皆總督巡撫自圖射利故也席柱奏曰 皇上所諭極是 上問廣東督撫何如席柱奏曰據彼處人云總督吳興祚居官頗善巡撫李士楨較前任巡撫金儁爲優 上曰此言最是凡居好官之後者最難勝任善名亦未易得居不肖官之後者最易勝任百姓苦前官不肖後官稍有好處卽易顯出前廣東巡撫內劉秉權居官稍優至盧興祖王來任金儁品行貪劣人民甚爲受累後李士楨到任稍優所以稱善卽今原任總督巡撫等或有貪婪積惡者今皆覆敗於己何益謂天報甚遠可乎又問爾到江南聞原任總督于成龍居官何如席柱奏曰臣過江南人俱說于成龍居官甚清但因輕信被

屬員欺罔 上曰于成龍因在直隸居官甚善朕特簡任江南總督後聞居官不及前變更素行至病故後始知其居官廉潔甚爲百姓所稱或于成龍素行鯁直與之不合者挾仇讒害造作屬下欺罔等語亦未可定是不肖之徒見嫉耳居官如于成龍者有幾又問總河靳輔爾曾見否河道近日如何席柱奏曰曾見靳輔顏色憔悴河道頗好漕運無阻臣來時見宿遷地方將水分排築隄共計五隄其二隄已完三隄正在修築水盛時開閘以殺其勢令其循隄四散分流無衝決之患 上曰河道關繫漕運甚爲緊要前召靳輔來京時眾議皆以爲宜更換朕思若另用一人則舊官難任新官推諉必致壞事所以嚴飭靳輔令其畱任限期修築今河工已成水歸故道有裨漕運商民使輕易他人必至貽悔矣學士圖納奏曰臣曾數至江南亦稍識河道形勢必順水性修理始

能有益若逆其性則不能治也 上曰順水性而治此自古常談也今則不然黃河不循故道渙散流沒今倒轉一百八十里令其復還故道所以爲難若但順水性修治有何難哉 上又問沿途田禾若何席柱奏曰福建田禾甚盛江南浙江田禾亦好山東雨水調順彼處百姓皆謂豐收之年但德州至真定雨水不足田禾稍旱自此至京師又覺好矣 上曰農事實爲國之本儉用乃居家之道是以朕聽政時必以此二者爲先務凡親民之官能仰體朕意在在竭力何慮不家給人足乎○以宋德宜爲文華殿大學士由吏部尚書遷○以吳毓珍爲山東按察使原任湖北按察使○丙子召問學士席柱曰朕前日未曾問及提督萬正色施琅伊等品行若何席柱奏曰陸路提督萬正色爲人忠厚和平居官亦優 上曰萬正色前督水師時奏臺灣斷不可取朕見其不能濟事故將施琅替

換令其勉力進勦遂一戰而克萬正色施琅二人今相睦否席柱奏曰二人陽爲和好陰爲嫉妒上曰施琅何如席柱奏曰施琅人材頗優善於用兵但行事微覺好勝上曰粗魯武夫未嘗學問度量褊淺恃功驕縱此理勢之必然也

八月丁酉以佟國佐爲浙江按察使

由陝西潼商道遷

○庚子以阿哈達

爲直隸巡撫

由內閣學士遷

○戊申上還京師

○戊申戶部右侍郎李

仙根工部左侍郎金鼐右侍郎金世鑑各降四級右侍郎巴錫降

二級俱調用以管理錢法失察弊端也○辛亥調李之芳爲吏部

尚書

由兵部

調○以范承勳爲內閣學士

由郎中遷

○壬子贈故少傅兼太子太師靖逆將軍侯甘肅提督張勇爲少師仍兼太子太師子祭

葬加祭二次謚襄壯○癸丑以牛紐爲內閣學士

由翰林院掌院學士遷

○甲寅大學士李霨卒遣大學士明珠同漢學士一員奠茶酒予祭

葬加祭一次謚文勤○乙卯刑部尚書魏象樞以病再奏乞休允之○宗人府議奏諸王之子減等冊封應將親王一子冊封爲世子候襲親王其餘諸子皆授爲貝子將郡王一子冊封長子候襲郡王其餘諸子皆授爲鎮國公貝勒以下皆有減等授封之例仍應照見行例行得旨親王諸子著授爲貝勒郡王諸子著授爲貝子餘如所議○以席特納爲工部右侍郎由左副都御史遷○以黃桂爲福建按察使由江南驛鹽道遷○戊午裁京口右路總兵○己未上御經筵○以金汝祥爲工部左侍郎由內閣學士遷○庚申以常書爲翰林院掌院學士由翰林院侍讀學士遷○癸亥調焦毓瑞爲戶部右侍郎以楊雍建爲兵部左侍郎由貴州巡撫遷○是月免直隸榆社縣水災額賦九月甲子朔諭大學士等向令開海貿易謂於閩粵邊海民生有益若此二省民用充阜財貨流通各省俱有裨益且出海貿易非

貧民所能富商大賈懋遷有無薄徵其稅不致累民可充閩粵兵餉以免腹裏省分轉輸協濟之勞腹裏省分錢糧有餘小民又獲安養故令開海貿易今若照奉差郎中伊爾格圖所奏給與各關定例款項於橋道渡口等處概行徵稅何以異於原無稅課之地反增設一關科斂乎此事恐致擾害民生爾等傳諭九卿詹事科道會議具奏○九卿等議覆御史李時謙奏今歲逢上元甲子請停止秋審從之○乙丑轉胡簡敬爲禮部左侍郎以嚴我斯爲禮部右侍郎由少詹事遷左○以王起元爲內閣學士原任○丙寅以張士甄爲刑部尚書由吏部左侍郎遷○徐旭齡爲工部右侍郎由山東巡撫遷覺羅孫果爲左副都御史由侍衛遷○九卿等議覆管理錢法侍郎陳廷敬等奏民間所不便者莫甚於錢價昂貴定例每錢一串值銀一兩今每銀一兩僅得錢八九百文不等錢日少而貴者皆由奸宄不法

之徒毀錢作銅牟利所致銅價每斤值銀一錢四五分不等計銀一兩僅買銅七斤有餘而毀錢一串得銅八斤十二兩卽以今日極貴之錢用銀一兩換錢八九百文銷毀可得銅七斤七八兩尙浮於買銅之所得何況錢價賤時平欲除毀錢之弊求制錢之多莫若鼓鑄稍輕之錢每錢約重一錢毀錢爲銅旣無厚利則毀錢之弊自絕錢價平而有利於民再查產鉛銅地方因地方官收稅種種作弊小民無利不行開採此後停其收稅任民採取則銅日多而價自平相應俱照所請通行各省遵行得旨依議開採銅斤聽民自便地方官仍不時稽察毋致爭鬪搶奪藉端生事致滋擾害○丁卯諭戶部尙書梁清標以原銜管兵部尙書事以余國柱爲戶部尙書由左都御史遷○庚午江南巡撫湯斌陞辭上諭曰以爾久侍講筵老成端謹江蘇爲東南重地故特簡用居官以正風俗

爲先江蘇風俗奢侈浮華爾當加意化導移風易俗非旦夕之事從容漸摩使之改心易慮當有成效錢糧歷年不清亦須留意爾在內閣曾閱章奏在外督撫所奏凡錢穀刑名大事多有乖錯致令駁察爾到地方尤當留意近日江南吏治稍稍就理爾能潔己率屬自然改觀湯斌出復傳諭曰湯斌在講筵年久今遠行其賜白金五百兩表裏十端臨行之日仍令入朝更有諭旨○轉明愛爲理藩院左侍郎以喇巴克爲理藩院右侍郎由內閣學士遷○以阿喇尼爲理藩院尙書由都統遷○癸酉以陳廷敬爲左都御史由吏部左侍郎遷

○乙亥禮部遵旨議覆虞舜東巡至於岱宗燔柴致祭漢高過魯以太牢事孔子俱係巡歷所至行致祭禮今皇上聖德神功同符堯舜倣古之制爰事東巡經過泰山闕里亦應致祭泰山照祀五嶽禮行孔子照闕里祀典行從之○諭戶部工部光祿寺堂司

各官朕凡巡幸一應動用之物皆從節儉此番巡幸戶部採買草豆工部木炭光祿寺食物勿令地方官派取民間擾害百姓爾等衙門前往官員按每程所用合其時價採買供給儻有派取民間者著令該督撫指名題參○厄魯特博碩克圖汗噶爾丹遣使古爾班拜等攜夥伴三千人入貢理藩院奏請官驗其符信毋得過二百人餘俱遣回上曰來人浮於定額著理藩院尙書阿喇尼前往酌量議遣○丙子兵部題原任福建總督姚啟聖修理兵船兵器浮冒錢糧四萬七千餘兩應行追賠得旨姚啟聖攻取臺灣著有勞績著免其追賠○戊寅調李天馥爲吏部左侍郎由戶部調○調慕天顏爲貴州巡撫由湖廣遷○己卯調胡簡敬爲吏部左侍郎管右侍郎事由禮讀學士遷○以丹岱爲內閣學士由內閣侍讀學士遷○禮部題磨勘順天鄉試卷文體不正三卷文理悖謬二卷正考官左春坊左諭

德秦松齡副考官翰林院編修王沛恩同考官內閣中書王鑑工部主事張雄俱應照例革職候選主事張曾祚應照例革職交刑部提問從之○庚辰調達哈他爲吏部左侍郎管右侍郎事由督  
侍郎○裁廩州總兵官改設遊擊一○辛巳調庫勒納爲兵部督捕左侍郎由戶部調○以張鵬爲山東巡撫由左副都御史遷○癸未諭大學士等近見凡朕諭令議奏之事部院諸臣皆首以上諭極是回奏朕命諸臣會議者但欲事得其理與眾意相符否耳並非必以朕言爲是令諸臣遵議也爾等可將此旨曉諭諸臣嗣後宜各抒所見勿復因循陋習○甲申轉焦毓瑞爲戶部左侍郎以王鴻緒爲戶部右侍郎由內閣學士遷○丙戌調鄂爾多爲戶部右侍郎由刑部調○丁亥詔曰帝王誕膺景命統御萬邦道重觀民政先求莫朕撫茲兆庶

期底時雍猶慮蔀屋艱難罔由上達故於直隸郡縣周覽巡行勤施補助更念山左等處土宜俗尙不加循省曷克周知矧歷逢甲子乘時命駕咨彼民依更昭公普之仁以奏誠和之治車駕所過賜復一年江南浙江江西湖廣自用兵以來供應繁苦其明年漕糧免三之一官吏軍民人等死罪以下咸赦除之○己丑以崔澄爲左副都御史由大理寺卿遷○兵部等衙門遵旨會議續順公沈瑞於康熙九年襲伊叔沈永興公爵康熙十三年逆賊劉進忠反沈瑞被擄臺灣雖受僞印但其時沈瑞年纔十二尙在幼小且不忘國恩協謀內應以待我大兵至康熙二十年十一月爲同謀僞鎮朱友出首全家被害此公爵仍應世襲俟查明應襲之人具題承襲從之○庚寅以蔣宏道爲內閣學士由少詹事遷○辛卯上啟鑾東巡○以石琳爲湖廣巡撫由浙江布政使遷○是月免湖廣江夏等四縣

衛水災賦有差

冬十月庚子 上幸濟南府○壬寅 上至泰安州登泰山○癸

卯 上祀東嶽○侍臣請往觀捨身崖 上曰愚民無知惑於妄

誕之說以捨身爲孝不知身體髮膚受之父母不敢毀傷故曾子有臨深履薄之懼且父母愛子惟疾之憂子旣捨身不能奉養父母是不孝也此等事處處有之正宜曉諭嚴禁使百姓不爲習俗所誤觀之何爲○丁未先是一應本章俱三日遞到一奏是日上坐待至二鼓數問本章到否諭大學士等奏章闕繫國政最爲緊要朕凡在巡幸之處奏到隨卽聽覽未嘗有一稽留前此遞本官員因其遲延已經議處此番本章何又來遲今日奏章不拘時

刻一到爾等卽行呈進朕宵興省覽是夜四鼓本章遞到呈進上卽起詳覽徹曙○庚戌 上駐蹕郊城河道總督靳輔迎駕諭

靳輔曰黃河屢次衝決久爲民害朕欲親至其地相度形勢察視  
隄工卽於今日前往○辛亥 駕發宿遷夾道叩閣者甚眾 上  
諭侍衛等曰此斷不可收覽民人果有冤抑地方督撫等官儘可  
申訴今因朕巡幸紛紜控告不過希圖倖准快其私怨一經發審  
其中事理未必皆實地方官奉爲欽件展轉駁訊則被告與原告  
皆致拖累以小忿而破身家後悔無及矣有天下者惟貴以德化  
民使之無訟卽賢能官吏亦當求訟簡刑清與民相安於無事若  
以多訟爲喜開爭競之風俗疲民困皆由於此○ 上臨閱黃河  
北岸諸險工諭河道總督靳輔曰朕向來留心河務每在宮中細  
覽河防諸書及爾屢年所進河圖與險工決口諸地名時加探討  
雖知險工修築之難未曾身歷河工其河勢之洶湧漶漫隄岸之  
遠近高下不能了然今詳勘地勢相度情形如蕭家渡九里岡崔

家鎮徐升壩七里溝黃家觜新莊一帶皆喫緊迎澑之處甚爲危險所築長隄與偏水壩須時加防護大略運道之患在黃河禦河全憑隄岸必南北兩隄修築堅固可免決齧則河水不致四潰水不四潰則濬滌淤墊沙去河深隄岸益可無虞今諸處隄防雖經整理還宜培薄增卑隨時修築以防未然不可忽也又如宿遷桃源清河上下舊設減水諸壩蓋欲分洩漲溢一使隄岸免於衝決可以束水歸槽一使下流疏洩可無淮弱黃強清河噴沙之慮近來凡有決工處所皆倣其意不過暫濟目前之急雖受其益亦有少損儻遇河水泛溢乘勢橫流安保今日減水壩不爲他年之決口乎且水流侵灌多壞民田朕心不忍爾當籌畫精詳措置得當使黃河之水順勢東下水行沙刷永無壅決則減水諸壩皆可不用運道既免梗塞之患民生亦無墊溺之憂庶幾一勞永逸河工

可告成也 上自擊隄夫作苦駐轡久之親加慰勞復諭靳輔曰  
隄上夫役風雨晝夜露宿草棲勞苦倍常所領工食爲數無幾恐  
有不肖官役從中侵蝕必使人人得霑實惠始無負朕軫恤至意  
○壬子 上臨視天妃閘水勢湍急指授河臣改爲草壩另設七  
里太平二閘以分水勢 上登舟是日過清河縣淮安府○癸丑  
諭江南江西總督王新命朕巡視直隸山東江南諸處惟高郵等  
地方百姓甚爲可憫今雖水涸民擇高阜棲息但廬舍田疇仍被  
水淹未復生業朕心殊爲不忍爾係地方大吏作何籌畫濬水通  
流拯此一方民命以副朕軫恤黎元至意○甲寅 御舟過高郵  
湖見民間田廬多在水中惻然念之因登岸巡行隄畔十餘里召  
耆老詳問致災之故復諭王新命曰朕此行原欲訪民間疾苦凡  
有地方利弊必設法興除使之各得其所昔堯憂一夫之不獲況

目覩此方被水情形豈可不爲拯濟耶○乙卯 御舟自儀真渡

揚子江泊鎮江府西門外○丙辰 上幸金山乘沙船渡揚子江

風浪恬靜舟行甚速 上顧侍臣曰自兵興以來恢復岳州長沙

多得此船之力今海寓承平昔時戰艦僅供巡幸渡江之用然安  
當思危治不忘亂朕乘此舟未嘗不念艱難用武之時非以遊觀

爲樂也 上登金山遊龍禪寺○丁巳弛海禁惟不得以火藥軍

器出洋○戊午 上駐蹕蘇州府○諭大學士等明太祖一代開

刱令主功德並隆朕巡省方域將及江甯鍾山之麓陵寢斯在朕

優禮前代況於其君實賢可遣祀如禮○己未 上幸虎邱○庚

申 上幸惠山○諭江甯巡撫湯斌朕欲周知地方風俗小民生

計有事巡行凡需用之物皆自內府儲備秋毫不取之民聞恐地  
方或有不肖官員借端妄派以致擾害窮民爾其加意嚴察如有

此等卽指名題參從重治罪其沿途供役縛夫及聞朕巡幸至此  
遠來聚觀百姓恐離家已遙不能自歸爾逐一詳察多方區畫令  
其還家爾巡撫率布政使卽從此回任料理此等事不必前送湯  
斌再四懇奏送 駕渡江 上允之又諭吳中縉紳汪琬原係翰  
林爲人厚重學問優通且居鄉安靜不預外事特賜 御筆手卷  
一軸爾遣人付與不必令其來見著卽在家謝恩

十一月壬戌朝 上至江甯登雨花臺觀其城郭山川形勢駐蹕  
江甯府城○癸亥遣內閣學士席爾達祭明太祖陵○諭大學士  
明珠尙書介山明太祖陵已遣官致祭但朕旣抵江甯距陵非遠  
其親爲拜奠是日 上謁明太祖陵過明故宮慨然久之 御製  
過金陵論曰金陵禹貢揚州之域秦立郡縣爲秣陵兩漢因之孫  
權時稱建業東晉及宋齊梁陳地號佳麗隋唐之間六朝舊迹漸

致湮沒南唐李氏始更築城名金陵府明有天下建都於此窺明太祖之意以爲宅中圖大控制四方千百世無有替也歲在甲子冬十一月朕省方南來駐蹕江甯將登鍾山酌酒於明太祖之陵道出故宮荆榛滿目昔者鳳闕之鬼峩今則頽垣斷壁矣昔者玉河之灣環今則荒溝廢岸矣路旁老民跪而進曰若爲建極殿若爲乾清宮階礎陞級猶得想見其華構焉夫明太祖以布衣起淮泗之間經營大業應天順人奄有區夏頃過其城市閭閻巷陌未改舊觀而宮闈無一存者覩此興懷能不有吳宮花草晉代衣冠之歎耶昔人論形勢之地首推燕秦金陵次之然金陵雖有長江之險爲天塹而地脈單弱無所憑倚六朝偏安弗克自振固歷數之不齊或亦地勢使然也明白文皇靖難之後嘗以燕京爲行在宣德末年遂徙而都之其時金陵臺殿苑囿之觀聲名文物之盛

南北並峙遠勝六朝迨承平既久忽於治安萬厯以後政事漸弛  
宦寺朋黨交相構陷門戶日分而士氣澆薄賦斂日繁而民心渙  
散鬪賊以烏合之眾唾手燕京宗社不守馬阮以齷僞之徒託名  
恢復僅快私仇使有明艱難創造之基業未三百年而爲邱墟哀  
可悲夫孟子曰天時不如地利地利不如人和有國家者知天心  
之可畏地利之不足恃兢兢業業取前代廢興之蹟日加儆惕焉  
則庶幾矣○賜從官表裏○甲子 上幸江甯教場命各將軍副  
都統總兵等官及內大臣侍衛等射 上親射右發五矢五中左  
發五矢四中士民觀者以數萬計皆踊躍蹈舞歡呼動地○申命  
江南督撫護明太祖陵○乙丑諭大學士等朕於政事無論大小  
從未有草率完結者每在宮中默坐卽以天下事經營籌畫於胸  
中簡任督撫之時又必詳加察訪蓋一方大吏賢能自能委率僚

屬今貪墨之風未必盡除然激勸激清正欲使之潛移默化也○  
命大學士明珠傳諭江甯府知府于成龍曰朕在京師卽聞爾居  
官廉潔今臨幸此地確加諮訪與前所聞無異是用賜爾朕親書  
手卷一軸嘉爾清操以示旌揚但人靡不有初鮮克有終爾必自  
始至終毋有改操務倣前總督于成龍正直潔清無負朕優眷之  
意 上自江甯回鑾 御舟泊儀鳳門外督撫提鎮以下大小文  
武官員及地方縉紳士民數十萬於兩岸跪送 上停舟諭曰朕  
向聞江南財賦之地今觀市鎮通衢似覺充盈其鄉村之饒人情  
之樸不及北方皆因粉飾奢華所致爾等大小有司當潔己愛民  
奉公守法激濁揚清體恤民隱以副朕老安少懷之意 上泊  
舟燕子磯讀書寫字每至夜分誠恐 聖躬過勞宜少自節養 上曰

朕自五齡卽知讀書八齡踐阼輒以學庸訓詁詢之左右求得大意而後愉快日所讀者必使字字成誦從來不肯自欺及四子之書旣已通貫乃讀尙書於典謨訓誥之中體會古帝王孜孜求治之意期見之施行及讀大易觀象玩占實覺義理悅心故樂此不疲耳○丙寅以王國泰爲浙江布政使由安徵按察使遷○丁卯命尙書

伊桑阿薩穆哈往視海口諭曰朕車駕南巡省民疾苦路經高郵寶應等處見民間廬舍田疇被水淹沒朕心甚爲軫念詢問其故具悉梗概高寶等處湖流原出海口以年久沙淤遂至壅塞今將入海故道濬治疏通可免水患自是往還每念及此不忍於懷此一方生靈必圖拯濟安全咸使得所始稱朕意爾等可往被水災州縣逐一詳勘於旬日內覆奏務期濟民除患縱有經費在所不惜爾等體朕至意速行○辛未 上黎明登岸臨閣高家堰隄工

諭河道總督靳輔朕觀高家堰地勢高於寶應高郵諸水數倍前人於此築石隄障水實爲淮揚屏蔽且使洪澤湖與淮水併力敵黃衝刷淤沙關繫最重今高堰舊口及周橋翟壩修築雖久仍須歲歲防護不可輕視以隳前功 上至清口復閱黃河南岸諸險工諭靳輔曰這運口將來水緊難行應再添造一座又諭今年黃水壩倒灌運河爾須酌一至妥之策務令水不倒灌○壬申諭漕運總督邵甘朕時巡之舉原欲周覽民情察訪吏治爾身爲大臣理應潔己率屬乃莅任以來並無善狀且多不謹處此朕得之輿情訪聞頗確邵甘奏曰臣庸劣菲材不知檢束負 皇上委任臣罪奚辭但以滿人官此土者惟臣一人不免爲眾所忌豈能自致苟善豈有不致聲譽者乎邵甘伏地謝罪且乞扈從 上命隨至

京候旨

上閱南岸煙墩險工過白洋河居人老幼數千跪迎限

畔其年老貧寒者各賜白金○甲戌予故直隸巡撫格爾古德祭

葬謚文清○乙亥召河道總督靳輔入行宮諭曰爾數年以來修

治河工著有成效鼴勉盡力朕已悉知此後當益加勉勵早告成

工使百姓各安舊業庶不負朕委任至意因以御書閱河隄詩

賜之○丁丑 上經泗水東境幸泉林寺 上瞻眺久之指示侍

臣曰此相傳子在川上處○以于成龍爲安徽按察使由江南江甯府遷

○戊寅 駕幸曲阜○己卯 上詣先師廟至奎文閣前降輦

步入大成門至大成殿行三跪九叩禮四配十哲兩廡從官分獻

御製祝文遣國子監祭酒阿禮瑚祭啟聖公 御製祝文幸詩

禮堂選孔氏子弟講大學易經諭衍聖公孔毓圻等至聖之道與

日月並行與天地同運萬世帝王咸所師法下逮公卿士庶罔不

率由爾等遠承聖澤務奉先訓以稱朕懷令衍聖公孔毓圻前引  
上步至大成殿肅瞻聖像顧問衍聖公孔毓圻曰像始於何  
年孔毓圻奏曰相傳東魏興和三年兗州刺史李珽始塑像 上  
以次觀顏子曾子子思孟子像又觀禮器有犧象雲雷三尊 上

問何代法物孔毓圻奏曰漢章帝元和二年親祀闕里所留祭器  
又觀石刻吳道子畫魯司寇像詣聖蹟殿周覽圖書及憑几像行  
教小影立像行像諸石刻顧問孔毓圻曰何像最真孔毓圻奏曰  
惟行教小影顏子從行者爲最真乃當年端木賜傳寫晉顧凱之  
重摹者 上問西偏是何處孔毓圻奏曰前爲金絲堂後爲啟聖  
公祠 上斂容駐望久之 上復至大成殿前命大學士等宣諭  
曰至聖之德與天地日月同其高明廣大無可指稱朕向來研求  
經義體思至道欲加贊頌莫能名言特書萬世師表四字懸額殿

中非云闡揚聖教亦以垂示將來又諭歷代帝王致祭闕里或置  
金銀器皿朕今親詣行禮務尊崇至聖異於前代所有曲柄黃蓋  
留供廟庭四時饗祀陳之以示朕尊聖之意 上出殿問大成殿  
榜孔毓圻奏曰宋徽宗飛白書至杏壇孔毓圻奏曰此先聖講道  
之所 上覽金臣黨懷英篆杏壇二字碑宋臣米芾書檜樹贊碑  
及宋真宗君臣所製孔子與七十二弟子贊觀先師手植檜孔毓  
圻奏曰明宏治十二年廟毀於火檜在門殿之間經火枝葉盡脫  
孤幹獨存今又二百年矣不枯不榮其堅如鐵色亦如之俗呼爲  
鐵樹前至奎文閣孔毓圻奏曰此歷代藏書之所 皇上頒賜之  
書皆藏其上 上問曰何處是先師所居之宅今尚有遺址否孔  
毓圻奏曰 皇上所御講筵之後有魯壁遺址乃先聖燕居之所  
上復入承聖門觀堂前太初石唐槐及銀杏樹升詩禮堂孔毓

折奏曰此當日鯉趨過庭得聞詩禮之處 上於堂後觀孔宅遺  
井命汲水嘗之顧問魯壁遺址孔毓折奏曰昔秦始皇焚詩書臣  
九世祖孔鮒豫藏尙書論語孝經諸書於壁中至漢魯恭王欲毀  
臣祖故宅以廣其宮聞壁中有金石絲竹之聲發之得竹簡古書  
故後世名其堂曰金絲云 上詣孔林於洙泗橋下馬步行至墓  
前酌酒行三叩禮 上閱墓碑問墓上是何草木孔毓折奏曰孔  
林草木皆當年羣弟子各自其國徙植種類繁多不能悉辨 上  
問孔林周圍幾許孔毓折奏曰共地一十八頃今二千餘年族人  
日繁祔葬無所 上曰何不開擴孔毓折奏曰林外皆版籍民田  
欲擴不能尙求特恩賜給 上曰卽具疏來孔毓折等叩頭謝恩  
○賜衍聖公孔毓折五經博士孔毓挺顏懋衡等及曲阜縣知縣  
孔興認日講四書易經書經解義各一部賜孔毓折狐裘貂裘各

一孔氏及四氏子孫在仕籍者蟒服孔氏子孫進士舉人貢生監生生員襲衣白金免曲阜縣明年租稅 御製過闕里詩是日上駐蹕兗州府 ○ 諭大學士明珠周公大聖人制禮作樂垂示萬世今廟在曲阜應行致祭此係重大典禮其遣恭親王常甯及禮部尚書介山偕往以示朕尊崇元聖之意 御製祝文 ○ 庚寅

上還京師 ○ 諭滿漢大學士九卿等奉差官員其特齋詔敕及出使大臣御前侍衛等凡係經過地方官接見應有定體至部院衙門差遣筆帖式等或有不肖之人要挾地方官以請安爲名恣其需索外吏疲於供應致累小民奚以堪此且伊等官職微末何由自達於上而有請安之舉應行禁止又諭大學士等部院大臣年高者藉以料理政事不以筋力爲禮卽如勒德洪亦有足疾原無礙於機務頃尚書李之芳齎捧本匣以衣裘厚重偶致失足此等

儻或至損傷朕心深爲不忍以後本匣可令尙書侍郎內年少壯者捧送諭部院知之○講官常書等奏冬至後向有停講之例皇上聖學日新寒暑無閒今易經講義已畢將進講詩經時值沴寒應否停講請旨上諭天氣雖寒朕於宮中煖閣可以進講且機務少暇每日披覽經義於學問多所裨益不必停講○是月免河南磁州湯陰安陽縣雹災額賦有差

十二月壬辰朔以蘇赫爲刑部右侍郎由通政使遷○贈故江南江西總督于成龍太子太保廕一子入監讀書○予故湖廣總督董衛國祭葬○甲午予故致仕禮部尙書帥顏保祭葬○戊戌諭大學士漕運總督邵甘人平常著革職查有無世職酌量給與應得之官隨旗行走○庚子賜江南安徽按察使于成龍之父原任阿達哈哈番于得水貂裘披領諭曰爾子于成龍居官清廉惟爾教子

有方特加賞賚爾其勸勉爾子殫心竭力始終如一朕不難頻加顯擢苟末路不終孤負國恩定行懲治亦爾家門之玷也又召八旗漢軍都統副都統侍郎等官諭曰國家自祖宗定鼎以來委任漢軍官員與滿洲一體其中頗有宣猷效力者如孟喬芳張存仁輩朝廷亦得其用比年漢軍居官者大不如初每赴外任多攜廉從汰侈糜費惟務黷貨累民恣肆放逸未能謹守法度如張長庚賈漢復白色純等不可勝舉屢加申飭尙多因循未見改轍茲者巡行江南見文武各官及軍民人等眾口一辭稱江甯知府于成龍清廉愛民朕心喜悅已面加獎勵超遷爲安徽按察使又特召于成龍父賞賜以示褒美廉吏至意凡爾八旗漢軍人等自今以後悉宜洗心滌慮痛除舊習或子弟官守在外宜各貽書訓勉果有潔己愛民如于成龍者朕立行擢用如猶怙非不悛國有常

法不能爲此輩貸也○九卿等議覆尙書伊桑阿等勘閱海口一疏請敕下河臣親往車路串場等河並白駒丁溪草堰等口逐一確勘作何挑濟深閼使高郵等州縣減水壩一帶運河水口引流入海其所用錢糧細數題估到日工部確議具奏若興工之時見任官員不足應聽該督題請委用庶協力分辨底續可期得旨新輔見在督理黃河隄岸又令兼海口必致兩誤且黃河海口係在兩處應令差官督理著再確議具奏○阿齊圖格隆等以達賴喇嘛奏疏復命疏言喀爾喀左右翼議好之事曾遣扎爾布柰往盟始則右翼不從繼則左翼不服是以未能協和但皇上安集流離使之和好誠善事也今仰遵聖旨復遣參巴陳布胡土克圖令於十二月到喀爾喀國定議謹遣拉木扎巴羅卜臧諾爾卜等齋奏以聞○甲辰先是侍郎蘇拜等奏鄭克塽劉國軒馮錫范明

裔朱桓等俱令赴京其武職一千六百有奇文職四百有奇或願回籍或願授職應聽部察例議敘兵四萬餘人願入伍歸農各聽其便 上命鄭克塽家口親族及劉國軒馮錫范本身家口俱令遣發來京其僞官並明裔朱桓等俱於附近各省安插墾荒餘如議至是鄭克塽等至京 上念其納土歸誠授鄭克塽公銜劉國軒馮錫范伯銜俱隸上三旗仍令該部撥給房屋田地 ○ 乙巳禮部尙書介山以病乞休允之 ○ 調杭艾爲禮部尙書以科爾坤爲戶部尙書由左都御史遷 ○ 丙午刑部議覆給事中楊爾淑奏直隸各省軍流人犯請照流徒尙陽堡甯古塔例嚴寒盛暑之時宜停發遣應不准行得旨軍流人犯甫離刑獄一綫僅存盛暑尙可嚴寒發去恐致有死亡之患朕心不忍嗣後著過嚴寒之時發遣 ○ 以徐旭齡爲漕運總督由工部侍郎遷 ○ 丁未吏部等衙門遵旨會議學政

關繫文敎造就人才嗣後停其論俸補授順天學政缺應將侍讀  
侍講諭德洗馬概行開列恭請簡用江南浙江學道缺停其補用  
郎中道府應將侍讀侍講諭德洗馬中允贊善亦概行開列恭請  
簡用其餘各省學道缺將應升進士出身之五部郎中及參議道  
知府等官選擇開列恭請簡用從之○戊申九卿等遵旨議奏海  
口及下游河事務應差官專任安徽按察使于成龍才守堪委請  
給發關防敕書差往經理但黃河海口雖在兩處必彼此協同方  
能有濟總河靳輔治河年久水勢地形其所熟悉應將一切事宜  
均申詳靳輔具題若工告成該部將靳輔一併議敘如無成效將  
靳輔一併議處其餘俱照前議從之○己酉以達哈他爲左都御  
史由吏部左侍郎遷○庚戌予故詹事加禮部侍郎沈荃祭葬謚文恪○  
予故正白旗滿洲都統賴塔祭葬加祭二次謚襄毅○工部遵旨

議奏黃河運河隄岸衝決河流遷徙者照舊例處分止於漫決河流不移者若在限年之內令經修官賠修如過年限令防守官賠修永爲定例從之○丙辰 上以歲除親祭 孝陵啟鑾○丁巳上謁 孝陵是日駐蹕湯泉賜守 孝陵官兵及護軍牛羊○

戊午 上回鑾○己未 上還京師○是月免江南宿遷縣及江西分宜等十七縣衛所旱災賦有差○是歲朝鮮暹羅琉球來貢○人丁戶口二千三十四萬六百五十五田地山蕩畦地五百八十九萬一千六百二十三頃三十七畝有奇徵銀二千七百二十一萬六百四十三兩有奇米豆麥六百九十一萬二千二百一十三石四斗有奇草二百二十九萬八千一百三十六束茶十五萬九千三百一十五引行鹽四百三十五萬六千一百五十引徵課銀二百七十六萬一千三百八兩有奇鑄錢二萬九千四百八十

五萬一千四百八十有奇

臣王先謙敬編

周潤蕃恭校

康熙二十四年乙丑春正月癸酉享 太廟祭畢顧內閣學士席爾達太常寺卿葛思泰曰往見贊禮郎宣讀祝版至朕名聲輒不揚父前子名禮經所載朕對越之次惟懼誠敬稍有未至無以昭格神靈爲子孫者通名於祖父豈可涉於慢易嗣後俱應高聲朗讀無庸顧忌○乙亥 上幸南苑行圍○丁丑 上還宮○癸未先是 上因將軍薩布素等不能及時進取羅刹田禾有失機宜降旨責之薩布素等上奏引罪 上命都統公瓦山侍郎郭不往黑龍江與薩布素等詳議應否攻取雅克薩城並作何舉行擇其有裨於事者奏聞至是瓦山等與薩布素會奏我兵於四月杪水

陸並進抵雅克薩招撫不行納款則攻其城儻萬難克取卽遵前旨毀其田禾以歸議政王大臣等議如所奏復請敕直隸山東山西河南巡撫每省派熟習火器兵二百五十人並選賢能官各四員豫備火器送京師至日增發薩布素軍前協攻雅克薩城 上諭議政王大臣等奏內不請發禁旅良是但直隸各省綠旗兵未厯戰陣且黑龍江火器甚多不須增用朕意選福建投誠善用藤牌官兵見在八旗及安插山東山西河南者付臺灣投誠左都督何佑等率往薩布素一應咨題多屬枝梧借端延滯度四月進兵不過刈取田禾事必無成此皆謗謠黑龍江狂悖之人從中沮議不欲成事而薩布素出身微賤高視若輩無敢有違用兵所關甚鉅宜周詳籌畫期於必克儻謀事草率復似明安達禮等退兵羅刹將益肆彼猖今自京城遣一賢能大臣總領軍事俟克取雅克

薩之日班師又發盛京兵五百人代黑龍江兵守城種地出征兵還亦令還盛京種地事宜遣戶部大臣一員督理所云早熟之穀卽內地春麥今我兵亦多種春麥及大麥油麥於隕霜之前六月皆可收穫則不以出師之故致曠一年耕作矣又藤牌兵給馬二千匹帶往盛京盛京各佐領亦派馬二千照舊制嚴督飼秣候京城馬到更代北行至馬喇等所養馬皆豫備於齊齊哈爾屯此間催趨月杪可到聞此路間有缺水處不免貽誤今自盛京抵烏喇自烏喇經新設驛站路直且近當從此徑抵黑龍江沿途馬匹或有倒斃馬喇以所備者定數補送如此則我軍之馬不致缺乏矣藤牌兵各帶礮彈或十圓或二十圓以行其餉銀兵月給二兩官月給三兩又諭議政王大臣等兵非善事不得已而用之向者羅刹無故犯邊收我逋逃後漸越界而來擾害索倫赫哲飛牙喀奇

勒爾諸地不遑甯處剽劫人口搶擄村莊攘奪貂皮肆惡多端是以屢遣人宣諭復移文來使羅刹竟不報命反深入赫哲飛牙喀一帶擾害益甚爰發兵黑龍江扼其來往之路羅刹又竊據如故不送還逋逃應卽翦滅今仰副天心大兵偏臨雅克薩城姑再以朕諭旨遣人宣布羅刹諭之曰前屢經遣人移文命爾等撤回人眾以逋逃歸我數年不報反深入內地縱掠民間子女構亂不休乃發兵截爾等路招撫恒滾諸地羅刹赦而不誅因爾等仍不去雅克薩特遣勁旅徂征以此兵威何難滅爾但率土之民朕無不惻然垂憫欲其得所故不忍遽加殲除反復告諴爾等欲相安無事可速回雅庫於彼爲界捕貳收賦毋復入內地構亂歸我逋逃我亦歸爾逃來之羅刹果爾則界上得以貿易彼此宴居兵戈不興儻執迷不悟仍然拒命大兵必攻破雅克薩城殲除爾眾矣如

此宣諭後羅刹果能遵旨卽回以雅庫爲界我兵卽駐紮於黑龍江設斥堠於雅克薩令疆圉帖然儻仍行抗拒則大兵相機而行若不於此周詳區畫今縱克取雅克薩城我進則彼退我退則彼進用兵無已邊民不安可否舉行爾等其詳議之於是議政王大臣等奏 上諭周詳遵此奉行甚裨於事統兵督耕大臣恭候欽簡 上命都統公彭春統兵副都統班達爾沙偕佟寶等參贊戶部侍郎薩海仍令督耕彭春等抵黑龍江後有移會雅克薩城文書用黑龍江將軍印○乙酉召試翰詹諸臣於保和殿 上親甲乙之其不稱者改官○丙戌河道總督靳輔遵旨陳奏河道善後事宜查徐州以上河道甚寬迫至徐州僅寬六十八丈束水不能暢流是以徐州迤上歲歲漫溢必須於毛城鋪地方添建減水閘一座王家山十八里屯添建減水閘三座北岸太谷山添建減

水閘二座平日閉閘束流遇有大漲則啟閘分洩以保徐城以上隴工又河流下行至睢甯縣兩山夾峙河面僅寬百丈河流又爲一束應於峯山龍虎山之旁開鑿減水閘四座又於歸仁堤添建石閘壩二座並將便民閘改深五六尺以資分洩又攔馬河應再添石閘一座使河流由閘先進積水以養壩尾又南岸各閘壩不特可以殺黃河怒漲更可分引黃水注洪澤湖使助淮流但洪澤湖周圍數百里一時不能灌滿恐仍有黃水倒灌運河之患必須再於清河縣西建雙金門石閘一座並於閘下挑引河一萬餘丈至於清河縣運口添建石閘一座更屬保運濟漕要工以上各工伏乞敕部確議得旨九卿詹事科道會議具奏○調蘇拜爲吏部右侍郎由禮部調○授阿達哈哈番馬喇副都統銜參贊黑龍江軍務○丁亥給事中楊爾淑奏請自乙丑科以後會試及順天鄉試四

書題目俱乞 欽定下部議行○戊子諭大學士等總河靳輔所

奏黃河南岸毛城鋪等處北岸太谷山等處宜建減水壩令水分  
流歸仁隄等處宜建石壩保護曾命九卿等會議朕南巡時靳輔  
亦稱自白洋河引黃水下流入洪澤湖駱馬湖以助淮水其下清  
河縣黃淮合流之處因有洞渦自能洗逐淤沙朕思導流之水總  
會於清河縣水勢既強流湍激湧必致踰越隄岸愈損民間田廬  
此減水壩雖有益於河工實無益於百姓不可不爲熟計爾等以  
朕意傳示九卿務籌久遠詳明議奏○遣鑾儀使侯林興珠赴公  
彭春軍參贊軍務○左副都御史張可前奏昔明太祖將當日政  
事輯成一書名曰寶訓我 皇上冊守同揆文武兼濟超越明太  
祖萬萬臣請敕內閣翰林諸臣備輯睿謨聖政彙成一書刊布寰  
宇以昭法守得旨朕御極以來孜孜圖治勤政愛民日理萬幾常

懷兢業雖海宇底定漸致昇平但風俗人心未臻上理這所請歷年政事彙集成書是否可行著內閣翰林院會議具奏○己丑上幸玉泉山

二月壬辰調馬世濟爲兵部右侍郎

由刑部調

○以崔澄爲直隸巡撫

由左副都御史遷

○癸巳以額星格爲禮部右侍郎

由副都統遷

○吏部右侍郎蘇拜以前任工部時管理錢法不覈減耗費命原品隨旗行走

○乙未上還宮○以張汎爲福建布政使

由貴州按察使遷

○丙申工部等衙門遵旨會議河道總督靳輔題修減水諸壩惟有益河道

恐致淹沒房田民人受累應否建造減水閘壩應令該地方官督撫等會議具題請旨得旨該督撫等會議具題必致遲誤此事著差會經看閱河道諳練河工司官一員速往與靳輔詳議若建壩分水不致多損民田著一面興工一面具題儻水無所歸多致淹

沒民田著會同該地方官督撫等官確議具奏○己亥調阿蘭泰

爲吏部右侍郎

由兵部調

○以胡昇獻爲左副都御史

由左僉都道遷

安爲安徽按察使

由淮揚道遷

○庚子以張可前爲刑部右侍郎

由副都御史遷

多宏

由左副都御史遷

遷御史○以周公丞接道統繼往開來功德茂著命九卿議授後裔

五經博士撥給祀田修葺廟宇○癸卯

上御經筵○廣東提督

許貞陛辭

上諭曰爾在江西著有戰功朕嘉爾勞故簡任提督

近聞廣東盜賊未靖爾宜加意緝捕以安民生

許貞奏曰廣東地

方多有溪水盜賊出沒其中最難捕治臣今設法打造小船安設

水路塘兵晝夜巡哨庶盜賊可息

上曰爾此去務加意綏輯使

兵民兩安斯無負職掌○以李之粹爲貴州按察使

由浙江傳道遷

○

甲辰調佛倫爲兵部左侍郎管右侍郎事轉蘇赫爲刑部左侍郎

以席柱爲刑部右侍郎

由內閣學士遷

○吏部題廣西巡撫施天裔將康

東南家

卷之三十五

五

熙二十年二十一年存貯倉庫銀米捏稱民欠具題應照蒙隱例革職從之○予故太子少保原任刑部侍郎宋文運祭葬謚端慤○乙巳上巡幸畿甸啟鑾○丙午諭大學士明珠 太祖實錄先以小本兼滿漢字迅速繕寫送進朕將恭覽焉若待白鹿紙牘寫大本 實錄同進則爲時太遲矣○以趙之鼎爲左副都御史由太常寺卿遷○庚戌以禪布爲內閣學士由翰林院侍講學士遷○辛亥諭大學士明珠朕觀今古文章風氣與時遞遷六經而外秦漢最爲古茂唐宋諸大家已不能及凡明體達用之資莫切於經史朕每披覽載籍非徒尋常摘句採取枝葉而已正以探索源流考鏡得失期於闔閭凡查覈錢糧必徹底澂清不至以完作欠額外科派方於小民實有利益朕於正供所入毫無濫用正以愛養物力使國有

三年九年之蓄縱遇水旱民生亦不至苦累朕所以留意清覈正欲加惠元元也○癸丑轉王鴻緒爲戶部左侍郎調董訥爲戶部右侍郎由禮部調○戊午命大學士明珠等傳諭天津總兵官劉國軒曰朕撫御寰區聿臻治理止臺灣餘孽一綫尚存雖屬小島未平猶慮海濱弗靖爾劉國軒身爲渠黨乃能仰識天時勸令鄭克塽納土來歸朕心嘉悅授爾總兵官之任聞爾家口眾多棲息無所

京城房舍人有定業况價值不貲爾安從得之今賜爾第宅俾有甯居以示優眷○己未 上還次南苑○以范承勳爲廣西巡撫

由內閣學士遷 ○庚申 上還宮

三月辛酉朔諭大學士等光祿寺估計價值等項頭緒甚多各物俱照時價須詳察估計使公私俱便釐剔諸弊逐一定爲條款以便永久遵行則國課不至妄費戶部儲有餘財凡有旱澇可以酌

量賑濟蠲免無所顧慮民間不致困苦大有裨益王熙等奏曰此

皇上以節儉治天下足國足民至意凡有急需自無虞匱乏矣

○壬戌以蔣宏道爲禮部右侍郎

由內閣學士遷

○癸亥詔曰孔子聖集

大成道隆德備朕躬詣曲阜志切欽崇應勒廟碑朕親行撰寫以

昭景行尊奉至意○以 御書萬世師表四字勒石並頒天下學

宮○詔修賦役全書○乙丑諭大學士等議政所關殊爲機密重

要今見凡所議之事方經議訖卽已宣露又滿洲蒙古都統本以

人材勇健授爲都統非以其練達事務而授之也都統中不克曉

達事務者甚多諸若此者宜罷其議政至於兵事乃都統之專責

仍照常豫議爾等以此意降旨於議政諸臣又諭戶部工部光祿

專司錢穀關繫緊要今聞招買書辦人等與本衙門官私自通賄

作弊甚至有官員承認事務代爲包攬此種情弊永行革除於事

方有裨益○左都督張琳等叩闈請議敘部議不准 上諭大學士等朕觀張琳等人材健壯效力行間俱至左都督有得拜他喇布勒哈番者亦有得拖沙喇哈番者其控籲若不行何以鼓舞後之效力者可令該部議敘○正黃旗漢軍公鄭克塽題請敘鄭聰等投誠功部議不准 上諭大學士等大兵進剿鄭聰等同鄭克塽卽獻臺灣投誠久踞海島之寇盡行消滅伊等著准其議敘○丙寅詔修南巡所過地方城垣圮壞者○戊辰 上考試滿洲官員繙譯召大學士明珠提督麻勒吉學士常書至養心殿令閱卷 上顧麻勒吉問曰爾會閱性理大全否其中意義亦能通曉耶麻勒吉奏曰臣雖曾看閱至皇極經世篇茫然不得其解 上曰皇極經世乃邵堯夫以數合理之書所推先天卦畫元會運世之數言之甚悉非淺學所能窺測其全書卷帙尙多程朱恐其流

於數學摘取大要著之此篇朕嘗細加研究畧識其義因出手批性理大全以示 上又顧常書曰爾會讀何書常書奏曰文選離騷諸書亦會看過但其用字僻奧比物連類多所未喻 上曰讀離騷當識其大義所在屈原以忠君愛國之心原本山川極命草木微文見志一篇之中三致意焉遂爲千古風騷之祖三百篇之後以此爲最且讀離騷者於作文深有裨益非獨拾其字句而已此學者所當知也 ○ 以徐乾學爲內閣學士由詹事遷 ○ 己巳戶部以纂修賦役全書擬滿郎中蒼柱等漢員外郎王之麟等六員引見上曰賦役全書一定將來永爲定例爾等必須精心詳慎務求要當編纂成書朕思田地一畝之外亦有零星不足畝者若將毫忽俱爲一釐雖目下易於辦理誠恐有累小民爾等尤宜詳加確議尚書余國柱奏曰臣等以爲毫忽以下民間無物可以稱量賦

役滿釐者固一釐完納卽毫忽之微亦必以一釐爲斷如此改定  
想亦不至累民 上曰此事關繫民間休戚爾等不可不博訪詳  
議 ○ 賑直隸順德廣平真定府屬饑 ○ 王申議政王大臣等議覆  
左都御史陳廷敬奏官員士庶冠服衣裘飾用之制婚喪之禮祈  
敕下廷臣博考舊章斟酌損益務合於中查順治九年已定婚喪  
之制康熙九年復定服飾之例見在遵行毋庸更議得旨如議凡  
服飾等項久經禁飭近見習俗奢靡服用僭濫者甚多皆因該管  
各官視爲具文並未實行稽察以致不遵定例嗣後必須著實奉  
行時加申飭務期返樸還淳恪循法制以副朕敦本務實崇尚節  
儉至意 ○ 甲戌講官常書孫在豐等奏恭逢 皇上萬壽請自十  
五日至二十一日暫停進講 上諭講書深有益於學問朕愛聽  
不倦前偶爾違和輒講數日心尙歉然朕欲將詩經速速講完不

必停也○乙亥以韓菼爲內閣學士

由翰林院選

侍郎○予故戶部侍

郎焦毓瑞祭葬○丁丑禮部議准左副都御史胡昇猷奏請

皇

上親定殿試題目並嚴飭閱卷諸臣以重大典諭大學士等殿試

設有讀卷官俱係大臣豈不相信縱有他故亦自有定例若題目

俱由朕親出不勝煩瑣卽如會試題目乃偶一行之豈遂爲例且

朕所出之題乃試官不出人所不能豫擬者若屢屢親出則人亦

能豫爲揣摩矣著傳諭九卿詹事科道仍照舊例行○己卯轉阿

蘭泰爲吏部左侍郎調薩海爲吏部右侍郎

由戶部調

○辛巳諭大學

士等朕南巡時見閭閻疾苦深爲軫念所經過地方如此其他省

可知今國帑充足朕欲蠲免直隸各省明歲錢糧以舒民困爾等

會同戶部豫行酌議俾天下均霑實惠其直隸順德等府正在饑

荒且此地供應甚多徭役殷繁今宜卽行議蠲畿輔撫循得所尤

爲有益爾等會同戶部議奏○癸未賜陸肯堂等一百二十二名進士及第出身有差○丁亥福建提督侯施琅奏請卹賞進勦澎湖傷亡兵丁部覆毋庸議上諭大學士等凡軍功議敘卹賞俱關緊要如遲延日期往返咨查恐奸宄之徒舞文作巧易生弊端朕思此等負兵早給一日卹賞使得早受一日實惠此後著一概速行議卹

夏四月辛卯諭大學士等從來道德文章原非二事能文之士必須先明理而學道之人亦貴能文章朕觀周程張朱諸子之書雖主於明道不尚辭華而其著作體裁簡要晰理精深何嘗不文質燦然令人神解意釋至近世則空疏不學之人借理學以自文其陋如崔蔚林本無知識文義荒謬岸然自負爲儒者眞可鄙也○授宋儒周惇頤後裔五經博士世職○九卿等議獨差往閩河郎東華錄

中杭靄奏毛城鋪等處建造閘壩有益黃河限岸運道民生等語  
應令總河靳輔乘時建造從之○壬辰轉鄂爾多爲戶部左侍郎  
調蘇赫爲戶部左侍郎管右侍郎事由刑部調○癸巳議政王大臣會

議今海內一統寰宇甯謐滿漢人民俱同一體應令出洋貿易以

彰庶富之治得旨開海貿易原欲令滿漢人民各遂生息儻有無

藉棍徒倚勢橫行借端生事貽害地方反爲不便應嚴加禁飭如

有違法者該督撫卽指名題參○乙未甘肅巡撫葉穆濟奏甯夏

靈州民隱官地萬一千餘畝應追其價及所漏地稅 上特免之

○丙申敘恢復江山常山功授浙江總督李之芳拖沙喇哈番世

職○戊戌大學士會同戶部遵旨議覆直隸永順保河等處圈占

地方應徵康熙二十一年地丁錢糧已經奉詔蠲免所有直隸八

府康熙二十三年未完地丁錢糧應盡豁除其永順保河未經圈

占地方及真順廣大等處康熙二十四年地丁各項正賦俱免三分之一上問曰康熙二十三年直隸八府未完地丁錢糧其數幾何戶部尙書科爾坤奏曰約有六十餘萬上又問曰康熙二十四年所免三分之一其數幾何科爾坤奏曰約有五十餘萬上曰朕御極以來早作夜思惟以愛養民生爲急邇來四方大定猶恐民氣未復時塵朕懷今軍國之需撙節制度自可足用必使百姓樂業家給人足無一夫不獲其所始慰宵旰况畿輔重地頻年旱災尤可憫恤這所奏著候諭旨行○轉席柱爲刑部左侍郎以傅臘塔爲刑部右侍郎由通政使遷○吏部等衙門奏禮部尙書杭艾原係宗室額奇屬下之人乃巧稱不係屬下控告又伊前任戶部尙書撥給地畝時檢取附近閩廂園池善地殊屬不合應將尙書佐領拜他喇布勒哈番又一拖沙喇哈番俱革去從之○戶部

議覆順天府尹張吉午奏請自康熙二十四年始凡民間開墾田畝永免圈取應不准行 上諭大學士等凡民間開墾田畝若圈與旗下恐致病民嗣後永不許圈如旗下有當撥給者其以戶部見存旗下餘田給之○副都統馬喇等奏臣等今年正月二十八日遣打虎兒副頭目倍勒爾率三十餘人往雅克薩城北務擒其生口並詳勘情形以報三月初五日倍勒爾等生擒羅刹七人回言雅克薩城垣廬舍如故又據生擒羅刹噶瓦力喇等云去歲雅克薩城內設立重木中寶以土築大兵至額蘇里卽遣人各處求援援兵千人今年二月前隊已至後隊未來去歲新到頭目額里克舍傳諭人眾大兵來此皆爾等殺掠所致自後再聞有擾索倫打虎兒者定行誅戮是以我等往來不敢持軍器前者釋回二人已送往國主處迄今未得主命雅克薩兵眾不滿千人後增發

者未知其數等語生擒羅利逃去一人見在六人遞送入京

上

諭倍勒爾等直抵雅克薩探其情形生擒羅利可嘉所司如例獎

賞其送至六人各給時服一襲送將軍薩布素處俟大兵進剿時

示以寬大之意悉行釋放○諭兵部人材不一有騎射精熟者亦

有長於別技者若概考以弓馬恐淹沒人材况從來爲將之道全

恃謀略不僅在武藝嗣後凡投誠官員但視軍功爲殿最其無軍

功者試以弓馬若旣無軍功又不嫻弓馬以文官不及例引見處

分彼亦心服無怨矣○授厄魯特伊拉克三胡土克圖爲歸化

城掌印扎薩克大喇嘛○己亥 上幸玉泉山○辛丑諭戶部朕

撫馭方夏愛養黎元早作夜思勤求治理閭閻疾苦無時不深軫

念欲使民生樂業比屋豐盈惟當已責蠲租萬姓得沾實惠直隸

地方頻遇旱災小民匱乏宜加恩恤順永保河等處圈占地方應

徵康熙二十一年地丁錢糧已經通行蠲免所有直隸八府康熙二十三年未完地丁錢糧盡與豁除其順永保河未經圈占地方及真順廣大等處康熙二十四年應徵地丁各項正賦俱著免三分之一爾部速行該地方官遵行曉諭務使人人得被膏澤以副朕勤恤民隱至意如有不肖有司借端蒙混私行重徵者或經參奏或被告發定行從重治罪爾部卽遵諭行○諭太醫院官朕研究經史之餘披閱諸子百家至黃帝素問內經諸篇觀其義蘊實有惻隱之心民生疾苦無不洞矚其後歷代醫家雖多著述各執己見若難經及痘疹諸書未能精思極論文義亦未貫通朕甚惜之當茲海宇昇平宜懷保吾民躋春臺而登壽域爾等可取醫林載籍酌古準今博採羣言折衷定論勒成一書以垂永久副朕軫恤元元至意○調哈占爲禮部尙書由兵部調○甲辰 上還宮○

丁未翰林院奏 皇上聰明天縱好學敏求洵從古所未有臣等會同詹事等官正在晝夜撰擬日講講章伏乞 皇上少緩進講俾得陸續撰擬進呈得旨仍著按日進講其講章爾等撰擬後節次進呈○戊申命旗人戶絕者別旗近支承祀○禮部議准福建總督王國安奏外國進貢船隻請抽稅令其貿易 上諭大學士等外國進貢船隻若行抽稅殊失大體且非朕柔遠之意王熙等奏曰大哉王言非臣等所能見及也○庚戌諭內務府今見內府佐領人員善射及讀書善文者甚少可專設學舍選可教之人令其學書習射優者錄用劣者罷出學舍應立於朕常見之處俾習學之人勉力肄業○丙辰命廣東花山設立縣治○丁巳 御製

榆樹賦勒碑闕里孔廟○是月免山東濟甯海豐霑化水災 江南徐州江西宜春等四縣衛前年被水額賦有差

五月庚申朔戶部議准郎中塞楞額奏福建設鎮二十座鑄錢將  
明代舊錢悉行銷毀 上諭大學士等舊錢流布不止福建一省  
他省亦皆有之止可聽其從容銷去若驟爲禁止恐不肖之徒借  
端生事貽害平民亦未可定所奏不准行 ○丙寅 皇子允祿生  
○己卯遣官賑阿霸垓部眾 ○庚辰四川川北總兵官趙宏燦奏  
保甯地氣溼熱臣生長西北水土最不相宜以致抱病乞調臣邊  
方寒苦之地得以盡力報效部議不准行得旨趙良棟父子效力  
行間勤勞素著著准趙宏燦所請以原銜調補直隸總兵官王秉  
燦以原銜調補四川總兵官 ○癸未諭大學士勒德洪明珠巴圖  
爾額爾克濟農違離彼土嚮化而來宜加愛養經理其居處彼等  
原爲鄂齊爾圖汗所屬累世進貢誠懇恪恭鄂齊爾圖汗之孫羅  
卜臧滾布與巴圖爾額爾克濟農當使聚合一處於所宜居之地

爲之經理令其居處賜之封號給以金印冊用昭示朕繼絕舉廢  
之至意焉可遣賢能台吉與理藩院堂官侍衛曉諭巴圖爾額爾  
克濟農云以爾等搶奪毛明安及三吳喇忒之故本宜遣兵征勦  
悉行翦滅但念鄂齊爾圖汗累世進貢誠懇恪恭特加矜恤爾等  
罪戾盡皆寬宥羅卜臧滾布乃鄂齊爾圖汗之孫爾等皆屬一國  
爲親近兄弟今令爾等皆與羅卜臧滾布等聚合封以名號與羅  
卜臧滾布等可以如此措置頒朕諭旨其宜居之地亦與羅卜臧  
滾布巴圖爾額克濟農等公同相視令所遣台吉等還奏此事於  
今年八月卽宜舉行爾等議政王大臣蒙古大臣會同詳議以聞  
○ 皇子允祚薨○九卿議准左僉都御史姚締虞奏凡大朝之  
期 皇上視朝最早回宮進講後仍御門聽政恐 聖躬太勞今  
四海昇平政事簡少請以後大朝之期及大雨大雪俱停止啟奏

或遇大寒大暑之日亦當酌定間幾日一御門聽政 上諭大學士等朕御極以來孜孜圖治罔有暇逸惟期裨益國家乂安兆庶用臻上理非不自知其勞但念庶政叢集一日萬幾若從所請未免始勤終怠且恐不及詳察致有疏略舛錯於政事得失所關非細自後大朝之期一切章奏交送內閣遇大雨雪臨時請旨其祁寒盛暑之時各部院果無應奏事宜方許暫止啟奏朕始終不欲一念倦怠晏安自便也○免追隨征四川兵長支月餉○命大學士勒德洪王熙等修政治典訓○甲申諭戶部原任廣西巡撫郝治前差兩淮巡鹽潔己奉公恤商裕課後經簡任廣西巡撫清廉愛民克稱厥職其所動錢糧非係入己從寬悉免追取以昭朕優恤廉吏至意○丙戌工部議覆湖廣巡撫石琳浙江巡撫趙士麟奏柟木杉木不能如期運至特請寬限應不准行 上諭大學士

等朕聞明時採運柟木從山至河民力告竭地方苦累今運各省  
所備柟木杉木若程限太迫恐山路崎嶇轉運艱難地方雖有良  
吏不能不苦累百姓其令部臣詳議緩運勿致累民○丁亥宗人  
府等衙門議安親王岳樂違例將外藩喇嘛留住伊廟奉旨查通  
醫喇嘛隱瞞不行舉出又僞稱喇嘛瘋魔耳聲擬革親王爵得旨  
從寬免革王爵將掌宗人府事及議政革去罰俸三年○戊子考  
試漢軍官員於太和門○諭大學士等九卿咸有條奏之責科道  
亦爲耳目之官凡有見聞及應行事宜當不時入告以明盡忠補  
過之義今天下雖已昇平而兵刑禮樂之大國計民生之繁豈皆  
事事允釐無一可言者耶爾等其以此旨徧諭廷臣焉○諭大學  
士等今歲雨暘時若二麥已登他穀亦皆沃茂秋成可望黎民不  
致阻饑但豪強富室田土既多收穫亦豐往往用之釀酒又輕值

糴藏以待重價貧民田少收穫有限更不節用效尤釀酒亦甚糜費雖遇豐年僅免饑餓儻遭荒歲何以自贍朕巡省閭閻厯厯親覩每一念及惻然於懷應作何禁止使家給人足爾等可籌良策以待秋期舉行○己丑調伊桑阿爲兵部尚書由吏部調○是月免山東臨清等二州旱災湖廣沔陽州水災田租及湖廣黃岡等十一州縣去年旱災賦

六月庚寅朔 上巡幸塞外啟鑾○辛卯御史錢珏奏陋弊相沿厲民爲甚者莫如山西火耗臣訪聞太原府諸州縣每經徵錢糧有司既收入己之耗而司道府廳又復多方需索有司不得不加派於民以致各州縣收銀每兩有加至三錢四錢不等者近聞晉撫穆爾賽曾經刊示傳諭禁止是知火耗之重而卽飭也然露章糾劾者寂然無聞又何怪州縣之視爲具文而貪饕成習耶臣欲

指名入告則在在皆然不勝枚舉但採訪至確不敢不仰籲宸  
聰急請禁止以甦一方之困得旨九卿詹事科道會同嚴加確議  
具奏○癸巳 車駕出古北口是日理藩院尙書阿喇尼奏侍郎  
明愛遣撥什庫席納爾圖馳報都統公彭春等帥師進發五月二  
十二日抵雅克薩城下遵旨將 皇上不忍加誅洪恩悉著於書  
致羅刹羅刹恃巢穴堅固不肯遷歸於是二十三日分水陸兵爲  
兩路列營二十四日夜將神威將軍等火器移置於前二十五日  
黎明並進急攻城中大驚羅刹城守頭目額里克舍等勢迫詣軍  
前稽額乞降都統公彭春黑龍江將軍薩布素等復宣 上恩德  
羅刹頭目額里克舍所部夷兵皆垂涕望闕稽首於是遵 皇上  
諭旨將羅刹所部官兵及婦女童稚立視遷歸收回逃人恢復雅  
克薩城 上顧阿喇尼曰征勦羅刹眾皆以路遠爲難朕獨斷興

師致討今荷天眷遂爾克之朕心嘉悅爾以捷音傳知諸王大臣既至行宮恭親王常甯等及文武官員請慶賀上遣阿喇尼僧兵部侍郎佛倫傳諭曰治國之道期於久安長治不可圖便一時當承平無事朕每殫心籌度卽今征羅刹之役似非甚要而所關最鉅羅刹擾我黑龍江松花江一帶三十餘年其所竊據距我朝發祥之地甚近不速加翦除恐邊徼之民不獲甯息朕親政之後卽留意於此細訪其土地形勝道路遠近及人物性情以故酌定天時地利運餉進兵機宜不徇眾見決意命將出師深入撻伐然兵貴相機而動變化無窮惟恐諸將不遵朕指授致失機宜今收復雅克薩地得遂初心至於撫綏外國在使之心服不在震之以威近遣親隨侍衛關保等往軍前諄諭之曰兵凶器戰危事古人不得已用之朕以仁治天下素不嗜殺爾其嚴諭將士毋違朕旨

以我兵馬精強器械堅利羅刹勢不能敵必獻地歸誠爾時勿殺一人俾還故土宣朕柔遠至意茲一一奉行朕甚嘉焉諸王大臣等奏征勦羅刹眾皆難之我皇上爲根本計獨斷興師今羅刹歸誠雅克薩城收復悉如睿算不爽毫髮誠非臣等淺近之人所能仰窺萬一也且前獲羅刹不加誅戮迨大兵壓境又遣關保等嚴諭將士誠以勿殺皇上好生之德覆被天下匪獨羅刹戴恩海外諸邦莫不傾向聖化臣等合行慶賀阿喇尼等進奏畢復出傳諭曰朕思凡事必周詳審度方獲實效不可輕率從事向者尙書明安達禮輕進致糧餉不繼將軍沙爾呼達巴海等失計半塗而歸遂致羅刹驕恣而索倫奇勒爾鄂羅春等心懷疑貳朕詢其失機情由一詳計今始奏功兵法云多算勝少算不勝詎可忽視且兵貴神速前逆賊吳三桂等叛朕思岳州係湖廣門戶遭

人指示速戰始克岳州遂一面進取四川以分賊勢一面密諭大將軍賴塔從廣西趨雲南於是諸省底定兵革休息然亦在將軍等奮勉效力耳儻怠忽不奉行雖有良策亦何益焉所以平定雲南賴塔之功最大縱有他過爲人控告朕究不加罪諸王大臣等奏三逆叛時在外將士皆與賊相持進取無期賴 聖上神謀內運決勝萬里恩威並用勦撫兼施所以負固巨孽剋日誅鋤又俯念賴塔有功曲賜保全凡效力行間者皆歡欣鼓舞臣等亦莫不感戴殊恩 上復諭曰前關保奏云我兵擬於四月二十八日水陸進發先期雷雨大作至二十六日江水泛溢又風逆舟不得前进及二十七日天晴水落二十八日平旦忽轉順風我兵揚帆潮流直上三日之程一朝而至陸路之兵雖疾行不及也又駐紮黑龍江兵丁適當肉食匱乏忽有鹿數萬自山趨下騎者馳射步者挺

擊及駕船筏於江中截獲者計五千有餘朕觀此二事豫知可以奏功因事未就祕而不發今旣蕩平故傳諭爾等知之諸王大臣等奏 皇上仁政上合天心故顯垂鑒佑國祚綿永萬年無疆之休於此可卜 上允行禮於是王等及文武官員行三跪九叩頭禮尋彭春等捷奏至得旨覽奏官兵星馳直逼雅克薩城下示以威德招撫羅刹免死放歸克復其城深爲可嘉在事人員從優議敘投誠羅刹巴西里等安插盛京其被擄之索倫打虎兒人眾仍各發回原地有喀爾喀厄魯特人口俱察送到部給發本主○丁酉 上覽太醫院奏知 皇四子偶爾患痢體中違和卽命回鑾○戊戌 上還京師親視 皇四子疾命醫療治遂愈○以蔣寅爲雲南按察使由浙江糧道遷○庚子復各省廩生餉糧三之一○癸卯諭大學士勒德洪學士麻爾圖納鄂羅斯入我邊塞擾害鄂羅

春索倫赫哲飛牙喀等處人民搶掠其家口雖屢肆兇暴朕不忍遠興兵革故未卽遣發大兵征討數遣使曉諭鄂羅斯特其遼遠仍復抗拒益侵犯我邊鄙之人肆虐不止用是遣大兵直抵雅克薩之城後因困迫已甚而後歸降爰遵朕命宥其因而後降之罪釋之使還大兵迅速征行破四十年盤踞之鄂羅斯於數日之間獲雅克薩城克奏厥績薩布素向來逗遛不進兵之罪應概從寬免又雅齊納鄂山本獲罪發遣之人其所互告之事仍行察議今進勦官兵殊屬勞苦令伊等暫回吉林烏喇地方於盛京打虎兒之兵酌量派往防守至雅克薩城雖已克取防禦決不可疏應於何地永駐官兵彈壓此時卽當定議著大學士勒德洪學士麻爾圖圖納同郎談關保與議政王大臣等會議具奏○吏部奏漢軍官員筆帖式及候補官員監生內曳白卷八百人俱應革職得旨

此輩毫無學問何可居官俱著解任令其讀書俟學習之後考試補用內有弓馬嫻熟願就武職效用者應於各旗酌量補用○乙巳上巡幸塞外啟鑾○己酉諭扈從諸臣朕喜觀書史徧閱聖賢經傳而通鑑一書關於治道尤爲切要雖不時繙閱恐有闕略故將資治通鑑綱目大全諸書皆以硃筆手自點定以通鑑綱目卷帙繁多未攜至此攜綱目彙纂用備披覽朕雖時時檢閱然不能盡記爾等職司文翰其各以所攜書籍進覽於是內閣翰林院詹事府諸臣以通鑑文選諸書呈進上覽竟復諭曰凡文武各官皆須讀書於古今得失加意研究爾等各攜諸書以備問答甚善朕所點定之書爾等亦試觀之內閣學士圖納翰林院學士常書等恭聞奏曰皇上萬幾之暇經傳悉加博覽又於通鑑諸書御筆點定自古帝王好學者遠不能及而諭旨猶謂不能盡記

仰見 皇上聖不自聖至意○裁浙江杭嘉湖道甯紹道二缺溫台運副一缺改巡台道爲分巡甯台道甯紹運副爲甯紹溫台分司○丁巳卹台州等處陣亡兵○是月免山西邢臺等二十州縣去年旱災賦